

# СЫЛНЫМУТ САДВЕЧЫШТЕ

Морко рүдө книгагудышто сылнымутым йоратыше-влак дене черетан вашлиймаш эртыш. Тиде гана үстел йыр Морко кундемын уста сылнымутчыжо Раисия Смирнова ден йолташыже-влак, «Морко памаш» клубын участникше-влак погыненыт ыле (снимкыште).

Раисия Смирнова Кугу Кожлаялеш шочын-кушкын, кызыт Овдасолаште ила. Чылалан палаш онай лийын: кузерак эртен йоча пагытше, могай школышто тунемын, могай книгагудаш йоратен? Мастер удырамаш илыш корныжо, усталык пашаж дене палдарыш, погынышо-влакын йодышыштлан вашештыш. Тиде жапыштак ятыр онай историй-влакым шарналтен каласкалыш.



Р.Смирнова почеламутым изиж годсек воза. Тудо шочмо кундемжым мокта, йоратымаш ден гражданский лирике дечат огеш коран. Шкенжын возымо икымше почеламутшыMAT лудын ончыктыш. Раисия Евгеньевна тыгак почеламут-влаклан семымат шкеак келыштарат. А пелашы-

же Геннадий Григорьевич гармоньым устан шокта. Тудын шоктымыжо почеш Валентина йолташ удыржо дене шуко сылне мурым йонгалтарышт.

Вара мутым книгагудо пеленысе «Морко памаш» клубын чолга енже Галина Кузьмина нале. Галина Васильевна шке возымо

«Шонго Макар» почеламутшым лудын ончыктыш.

Тыгай уста ен-влак дене ме кугешнена да умбакыжат пенгыде кылым кучаш тўналына. Марий сылнымутышто у лўм-влак эшеат ешаралтыт манын ўшанен кодына.

**Людмила АЛЕКСАНДРОВА,**  
книгагудо пашаен